

# Vergässlech



**Texscht : Mike Sutter**  
**Musig : Mike Sutter**

**i bi nid sehr zueverlässig, sorry, s'tuet mer leid  
chume immer z'schpoot u ha mänge Seich scho gseit  
doch i eim do bi ni würklech absolut verlässlech  
i bi - i gibe's ungärn zue - unerhört vergässlech**

**Du chasch mir di Name säge, zäh Sekunde schpöter  
säg i - obwouh du Tinu heissisch - dir Thömu oder Peter  
Du chasch mit mer Duzis mache, z'nöchschte mou we mir  
enanger wieder gseh de säge n'i dir wieder 'Dir'**

**Di Geburtstag geit vo mir unbemerkt verbii  
drum trage ni ne gäng vorzue i mi Agända i  
doch ou das Johr wirsch du wouh wieder um Dis Gschänkli bschisse  
wüu i mi Agända immer irgendwo vergisse**

**I wett Dir - wie scho so mängisch - gschwing telefoniere  
das geit nid ohni dass i s'hunderteufi kontaktiere  
Du wottscht vo mir mis eigete Natelnummero  
ke Problem - wüu is nie weiss ha n'is i Schpicher to**

**sött i im Chäuer öppis hole chasch de sicher si  
dass i nümme weiss was i ha wöue we ni dunge bi  
auso wieder ufe und ir Wohnig faut's mer i  
drfür ha ni im Chäuer jetz dr Schlüssu nümme drbi**

**I ha nöi ä chliini Chatz i tue se Whiskas toufe  
de lis i ihre Name immer we re z'frässe choufe  
U mi Super-Computer, dä isch Passwortgschützt  
dr Grund dass mir die Chischte meischtens überhaupt nüt nützt**

**gang i go Kommissionen mache schribe ni mir gschwing  
für dass i nüt vergisse uf ne Zedu au die Ding  
im Migros irre n'i dasume, was mer piinlech isch  
wüu mi Zedu ligt deheime uf em Chuchitisch**

**erscht bim heichoo fing i ne und gseh druffe sctoh  
was i aues ha vergässe und muess no mou go  
wo ni de a dr Kasse au das Züg zum zahle gibe  
merk i dass i s'Portmone deheime ha lo lige**

i fahre mit mim Outo, zfride über Land  
das heisst nach churzer Zyt, scheid dr Chlapf am Schtrosserand  
und ig, i gange nüm so zfride bi däm gruusig räge  
mit ämne Kanischer am nöchschte Dorf entgä

Dir gseht äs isch äs Übu dass i immer aus vergisse  
bschtändig bi ni irgendöppis furchtbar am vermisse  
i ha Angscht äs chunnt so wit dass eines Tages i  
säuber mi vergisse - u nüm weiss wär i bi